



PAENITENTIARIA APOSTOLICA

Prot. N. 232/21/1

DECRETUM

PAENITENTIARIA APOSTOLICA, vi facultatum sibi specialissimo modo a Sanctissimo in Christo Patre et Domino Nostro, Domino FRANCISCO Divina Providentia Papa tributarum, Eminentissimo ac Reverendissimo Patri Domino PETRO, Titulo Sanctorum Simonis et Iudae Thaddaei ad Turrim Angelam, Sanctae Romanae Ecclesiae Cardinali PAROLIN, Secretario Status, benigne concedit ut, die XV Februarii MMXXI, in ipso die festo Beatae Mariae v.d. "Madonna del Conforto", post sollemniter litatum Divinum Sacrificium in Arretino Cathedrali Templo, impertiat Episcopis, canonicis aliisque presbyteris, diaconis, religiosis viris ac mulieribus, confraternitatum sodalibus omnibusque piis christifidelibus adstantibus, qui vere paenitentes atque caritate compulsi iisdem interfuerint sacris, PAPALEM BENEDICTIONEM cum adnexa plenaria Indulgentia, suetis sub condicionibus (sacramentali confessione, eucharistica communione et oratione ad mentem Summi Pontificis) lucranda.

Christifideles qui PAPALEM BENEDICTIONEM devote acceperint, etsi, rationabili circumstantia, sacris ritibus physice non adfuerint, dummodo ritus ipsos, dum peraguntur, ope instrumenti televisifici vel radiophonici propagatos pia mentis intentione secuti fuerint, plenariam Indulgentiam, ad normam iuris, consequi valebunt.

Contrariis quibuscumque minime obstantibus.

Datum Romae, ex aedibus Paenitentiariae Apostolicae, die IV mensis Februarii, anno Reparatae Salutis MMXXI.

Maurus Card. Piacenza
MAURUS Card. PIACENZA
Paenitentiaris Maior

Mons. Krzysztof Nykiel
Christophorus Nykiel
Regens